

Parkeringstilhøva ved Valestrand Oppvekstsenter

Ved litt store tilskipingar på Valestrand Oppvekstsenter er det ønskjeleg med meir plass til parkering for bilar. Etter som skulen har teke i bruk store deler av utearealet til ulike fritidsaktivitetar er tilgong til parkeringsplass etterkvart redusert.

Dette meiner eg, Ole Daniel Eidsvåg det bør gjerast noko med. Eg tenkte å «lufta» dette på møte Bygdelaget hadde på skulen nå sist tirsdag den 14.2. , men fann det rettast først å ta dette opp med grunneigar Andres Blytt. Det gjorde eg nå på lørdag den 18.2. og Andres og eg hadde samtale og synfaring på skuleområdet. Arealet eg meiner kan vera aktuelt til meir parkeringsplass er området som ligg på nedsida av fylkesvegen og på sørsida av nedkjøringa til skuleplassen. Altså nordre del av beiteområdet til Andres.

Det som gledde meg var at Andres delte mine tankar og sa seg villig til å selja eit høveleg areal til dette føremål. Arealet som ligg mellom fylkesvegen og den gamle, fine steingarden på nedsida, i ei lengd 30 – 40 meter mot sør, vil gje plass til ein god del bilar.

Eg har litt røynsle med slikt arbeid og vil påstå at arealet vil vera lett og forholdsvis rimeleg å få opparbeidd. Det grunne jordlaget som ligg på fjellet kunne me lempa på sørsida og brukast til å fylla ut og sletta terrenget på beite der, seier Andres. Elles blir det litt, men minimalt med boring og sprenging, kun for å senka dei høgaste fjellknattane som stikk opp. Steinmassen som trengs bør ein få tilkjørt frå steinbrotet i Tindadalen og utplanert med gravemaskin.

Eg vil tru at den formelle søknadsprosessen bør kunna gå greit. Kristian Råsberg som handsama slike saker då han var tilsett i kommunen, var alltid villig å finna gode enkle løysingar og han meinte det var høve til å fråvika godkjenningsgebyr når det gjeld veldedige og allmenntyttege føremål.

Kanskje Bygdelaget kan påta seg å vera formell aktør ved å fremja saka ?

Når det gjeld kostnad og finansiering av tiltaket, er det ønskjeleg at kommunen tek største del av kostnaden. Eg ser likevel ikkje bort frå at prosjektet kan løysast ved hjelp av eit «spleiselag».

Det er ønskjeleg at fleire enn meg «tenner» på forslaget om å få betra parkeringstilhøva ved Valestrand Oppvekstsenter.

Tittelsnes, 19.2.2017

Ole Daniel Eidsvåg
Ole Daniel Eidsvåg

Skrivet levert til :

Hans E Andersen
Per Eiriksen
Andres Blytt
Bjarne Kellseter